

22. oktober 2013

UKA 2013/132
Hans Enoksen

Ukioq naallugu sapaatip akunnikkaartumik Narsarsuup Keflavik-illu akornanni amigartooruteqarsinnaanermut qulakkeerutissalimmik 1. januar 2014-imiit timmisartogartalernissaanik Naalakkersuisut pilersitsinissamik peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Kim Kielsen, Siumut)

Inatsisartunut ilaasortaq Kim Kielsen Siumut inatsisartut aalajangiiffigisassatut siunnersuuteqarpoq ukioq naallugu Narsarsuup Keflavik-illu akornanni sapaatip akunnikkaartumik angalasoqartalernissaanut tamannalu Siumumit oqaaseqarfigissavarput.

Nunatta kujataani ilaasunik angallassinikkut pissutsit ilungersunartumik inisseqqanerat silaannakkut imaatigullu ilaasunik angallassinermi pitsaanerpaajunngitsut oqaatigisariaqarparput. Tassami tamatta ilisimalluarparput nunaqarfiit illoqarfiillu akornanni aqqusineqanngitsoq najugaqarfigullu qimallugit aallassagutta imaatigut silaannakkullu aatsaat periarfissat arlaat atorlugu angalasariaqartugut.

Taammaattorli angalasinnaanerit ilungersunarlutillu killeqarluinnaraluartut nunarsuarmi akisunerpaamik akiliisartutut oqassalluta uniorpallaarunangilaq, ilaasunut billittimik qaffasinnerpaamik akileeriarluta taava aamma qaavatigut ilaasunik sullissinermut 120 millioner koruunit inuiaqatigiit qavatigut akiliiseqqittarpagut, akikinnerusinnaanngilaa?

Nunatta kujaataani najugallit imarpik qulaallugu timmisartukkut angalaniarunik massakut tamatigut Kangerlussuakkoqqaarlutik aatsaat angalasarnerat kujataarmiunut ilungersunartutut oqaatigissallugu uniorpallaarunangilaq, tassami imarpik qulaallugu timmisartunut mittarfeqarfik Narsarsuaq piareeqqavoq atoriannaalluni. Aammalu ilaasut piffissaq aningaasallu atortagaat eqqarsaatigalugit illersorneqarsinnaanngitsutut oqaatigisariaqarmat tassami mittarfik Narsarsuarmi ammavoq pisariaqanngivikkaluarlunilu kujaataani imarpik qulaallugu angalasussat Kangerlussuarmukaanqartarnerat.

Kujataani inuussutissarsiornikkut suliffissatigullu kinguariartuinnarneq pissuteqarpoq periarfissat angallannikkut killeqariartuinnartut killeqarpallaalersimasorlu, angallannikkut pissutsit ilungersunarnerat pissutaaqataalluinnarmat. Tamatumalu kinguneraa ilaatigut takornarissat kujataarmiullu angalanerisa killeqariartuinnarnerat, soorunami angallannikkut periarfissat pitsaanngippata aamma takornarissatut angalaniartutut nunatta kujataa ornissallugu kajumernarnaviangimmat.

Angallanneq pitsaanerulerpat inuillu angalasinnaanerat eqaannerulerpat aningaasarsiornikkut kujataani pissutsit pitsaanerulernissaat takorloorneqarsinnaavoq, aammalu suliffissaqarnikkut qularnangilaq pissutsit pitsaanerulersinneqarsinnaasut. Pingaartumik takornarissat amerlanerusut kujataanut takkuttalissasut ilimagissallugu pissutissaqarpugut, tas-

sami takornariarpassuit Island-imut tikittartut aamma periarfissaqalissagaluarmata toqqaannartumik nunatta kujataanut angalasinnaalernissaannut.

Ullumikkut aamma kujataani silaannakkut angallanneq eqqarsaatigalugu ilungersunartorujussuarmik inissisimapput ilaatigut sila ajulaarpat kinguaattoornerit ingerlaannaq aallartitartut qularnanngilarlu aamma nunatta avataanut angalaniartut eqqugaasartut piffissamik aningaasanillu nalilimmik.

Taamaattumik kammattuutigaarput kujataani Island-i aqqusaarlugu sapaatip akunnikkaartumik periarfissamik Naalakkersuisut misissueqqullugit. Taamatut Siumumit oqaaseqarluta Sanaartornermut Ataatsimiititaliamut ingerlanneqassasoq innersuussutigaarput.